



Inatsisartunut ilaasortaq,
Aqqaluaq B. Egede, Inuit Ataqtigiit

Maani/

§ 37 naapertorlugu apeqput nr. 304-mut akissutit

Inatsisartut suleriaasianni § 37, imm. 1 naapertorlugu Qeqertarsuup Tunuani qalerallinnut pisassiissutit ilaneqarnissaat pillugit Naalakkersuisunut apeqquteqarsimavutit. Apeqqutit suliaasaqarfigisannit akineqartussanngorlugit innersuunneqarput.

Naalakkersuisunut apeqqutigisat:

Apeqput 1: Naalakkersuisut Qeqertarsuup tunuani aalisagartassiissutinik, tassa qalerallinnik pisassanik qaffaanerat ima paasisariaqarpa Naalakkersuisut pisassiissutinik ikililerinninniarnertik isumaqatigiunnaarsimagaa?

Akissut: Eqqorpoq Naalakkersuisut 2018-imi Qeqertarsuup Tunuani aamma Upernavimmi qalerallinnut pisassiissutinik ikilisaanermik aallartitsiniarlutik aalajangermata, matumani siunissami ilisimatuussutsikkut siunnersuinerit qanillattorniarlugit, taamaaliornikkut aalisarneq siunissami piujuartitsinermik tunngaveqarluni ingerlanneqarsinnaassammatt. Ukioq mannali pisut kingunerisimavaat allatut ajornartumik pisut nalilersoqqittariaqalersimagatsigit, tamannalu tunngavigalugu iliuseqarluta.

Apeqput 2: Naalakkersuisut qalerallittasasiissutinik qaffaanerat, imaappa, pinngortitaleriffiup innersuussutaa naapertuutitngitsutut Naalakkersuisut nalilersimagaat?

Akissut: Naalakkersuisut Pinngortitaleriffiup siunnersuisarnerat ataqqivaat. Naalakkersuisut ingerlaavartumik Pinngortitaleriffik isumasiortarpaat, Naalakkersuisullu isumaqarluinnarput siunnersuisarnerit atorsinnaasut. Pisassiissutinilli aalajangersaarniarnermi pissutsit arlallit isiginiartariaqartarput. Aqutsiveqarfinni tamani tamatumunnga ilisimatuussutsikkut siunnersuinerit kiisalu najukkani inuiaqatigiit aningaasaqarnerannut sulisoqarniarnikkullu atugarisat tunngavigalugit immikkut nalilersuisoqartarpoq. Ukiup ingerlanerani aalisarnermi ilaatigooriarluni immikkut ineriartortoqarsinnaasarpog naleqqussarnissamik pisariaqartitsilersunik.

Apeqput 3: Naalakkersuisut isumaqarpat Qeqertarsuup tunuani qalerallit angissutsimikkut milliartornerat ima ernumanangitsigilersimasog allaat Naalakkersuisut pisassanik ikililerinissaminnut tunngavigisinnaanagu?

Akissut: Naalakkersuisut siunnersuinerit Pinngortitaleriffimmeersut pillugit ilisimatinneqartuaput. Ukiuni kingullerni qalerallit milliartulersimapput. Tamanna ernumanartoqarpoq, Naalakkersuisullu soorunami tamanna isiginngitsuusaarniannigilaat.

Ulloq: 24-09-2019
Sulap normua: 2015-14973
All. nr.: 11610019

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanaoq.gl
www.naalakkersuisut.gl

Apeqquut 4: Suna pissutaava Naalakkersuisut qaleralittassanik pisassiissutissanut innersuussutaasut marloriaammik sinnerlugit pisassiinissaannut?

Akissut: Qeqertarsuup Tunuani pisoq aalisartunut taakkualu ilaqutaannut sunniinerluttussaavoq, allatullu ajornartumik Naalakkersuisut pisoq nalilersorsimavaat, ukiullu sinneranut aalisarneq, taamaalillunilu isertitaqarnissamut periarfissat qulakkeerniarsimallugit. Matumani pisumi pisassiissutit ilanissaat pillugu aalajangerneq aaqqiissutissaqqinnerpaajusutut nalilerneqarpoq. Taamaalillunilu taamatut aalajangerneq suliffissaqartitsiniarnerit eqqarsaatigalugit pisimavoq.

Apeqquut 5: Nunatta aningaasameerana pissutaava pisassiissutissatut innersuussutigineqartuniit marloriaammik annertutigisumik Naalakkersuisut qaleralittaassiinerannut?

Akissut: Qaleralinniarneq nunatta aningaasaqarneranut pingaaruteqartuuvog aamma aalisartunut ataasiakkaanut taakkualu ilaqutaannut – aalisartut aningaasaqarnerat soorunalimi Naalakkersuisut nalilersimavaat, taamaammallu Qeqertarsuup Tunuani pisassiissutit ilaneqarnissaat pisariaqartoq.

Apeqquut 6: Imaluunniit imaappa Naalakkersuisut qaleralittassiissutininik marloriaammik qaffaernerat peqquteqartoq naalakkersuinikkut ajornartorsiortoqarnera tunngavigalugu qinersisoqariataarnissaa pissappat aalisartut qinersisartut pitsaasaarfiginiarlugit?

Akissut: Naalakkersuisut qinersinissaq tullinguuttoq tunngavigalugu aalajangiisimangimmata erseqqissarneqassaaq.

Apeqquut 7: Naalakkersuisut aalajangiunnikuuaat ukiut sisamat ingerlaneranni Qeqertarsuup tunuani qaleralittassat 4000 tonsit missaannik appartinneqassasut. Isuma tamanna Naalakkersuisut suli attappaat?

Akissut: Apeqquut 1-imut akissutigineqartoq innersuussutigineqarpoq.

Apeqquut 8: Pinngortitaleriffiup innersuussutaanniit marloriaammik annertunerusumik massakkut Naalakkersuisut pisassiinerat paasissutissat nutaat suut tunngavigalugit Naalakkersuisut aalajangiuppaat?

Akissut: Pisassiissutit ilaneqarnerat Pinngortitaleriffimiit paasissutissiisimanermik pissuteqanngilaq.

Inussiarnersumik inuulluaqqusillunga



Jens Immanuelson

Aalisarnermut, Piniarnermut Nunalerinermullu Naalakkersuisoq

INUIT ATAQATIGIIT

Inatsisartuni



12. september 2019

Inatsisartut suleriaasianni §37 naapertorlugu apeqqutit imaattut Naalakkersuisunut ingerlatippakka:

Naalakkersuisunut apeqqutit:

- 1. Naalakkersuisut Qeqertarsuup tunuani aalisagartassiissutinik, tassa qaleralinnik pisassanik qaffaanerat ima paasisariaqarpa Naalakkersuisut pisassiissutinik ikililerinninniarnertik isumaqatigiunnaarsimagaa?**
- 2. Naalakkersuisut qaleralittasasiissutinik qaffaanerat, imaappa, pinngortitaleriffiup innersuussutaa naapertuutinningsutut Naalakkersuisut nalilersimagaat?**
- 3. Naalakkersuisut isumaqarpat Qeqertarsuup tunuani qalerallit angissutsimikkut milliartornerat ima ernumanangitsigilersimasoq allaat Naalakkersuisut pisassanik ikililerinissaminnut tunngavigisinnaanagu?**
- 4. Suna pissutaava Naalakkersuisut qaleralittassanik pisassiissutissanut innersuussutaasut marloriaammik sinnerlugit pisassiinissaannut?**
- 5. Nunatta aningaasameernera pissutaava pisassiissutissatut innersuussutigineqartuniit marloriaammik annertutigisumik Naalakkersuisut qaleralittaassiinerannut?**
- 6. Imaluunniit imaappa Naalakkersuisut qaleralittassiissutinik marloriaammik qaffaanerat peqquteqartoq naalakkersuinikkut ajornartorsiortoqarnera tunngavigalugu qinersisoqariataarnissaa pissappat aalisartut qinersisartut pitsaasaarfiginiarlugit?**
- 7. Naalakkersuisut aalajangiunnikuuaat ukiut sisamat ingerlaneranni Qeqertarsuup tunuani qaleralittassat 4000 tonsit missaannik appartinneqassasut. Isuma tamanna Naalakkersuisut suli attappaat?**
- 8. Pinngortitaleriffiup innersuussutaanniit marloriaammik annertunerusumik massakkut Naalakkersuisut pisassiinerat paasissutissat nutaat suut tunngavigalugit Naalakkersuisut aalajangiuppaat?**

(Inatsisartunut Ilaasortaq Aqqaluaq B. Egede, Inuit Ataqatigiit)

Tunngavilersuut:

Naalakkersuisut ukiut kingulliit siunnerfigisaat, tassalu, qaleralittassiissutinik appaarujussuortoqarnissaannik aalajangersimanerat maanna mumippoq, allaat qaleralittassat Qeqertarsuup tunuani marloriaatinngorlutik. Tamanna sumik patsiseqarnerasoq paaserusuppara. Ilanngullugu Naalakkersuisut isummaminnik allannguinerat annertoq sumik paasissutissamik nutaamik tunngaveqarnerasoq paaserusullugu. Kissaatigaara akissutit ullut suliffiusut qulit qaangiutsinnagit akineqarnissaat.

Qinnutigissavara apeqquteqaatima ullut suliffiusut qulit iluanni akineqarnissaat.